

知

足

齋

文

集

皇清誥授光祿大夫 經筵日講起居注官 太子太

傳 南書房供奉體仁閣大學士管理工部兼翰
林院掌院學士 贈太傅入祀賢良祠 賜謚

文正顯考南厓府君年譜卷上

府君姓朱氏諱珪字石君號南厓晚號盤陀老人

順天大興人遠祖福三公當元至元間始居浙東

以上無徵明洪永間德三公遷蕭山之黃閣河遂

爲黃閣河朱氏八傳至遊擊公諱尙納仕明末生

贈公諱必名是爲府君曾祖配白太夫人中書

公諱登俊知湖北長陽縣四川珙縣內遷中書科

中書是爲府君祖不孝錫經謹按五伯父所撰先

祖行述載中書公知長陽縣十二年以憂去民爭

送數百里外其惠政具載縣志是時高安朱文端

公亦爲令湖北以同姓爲兄弟清名相若配何太

夫人生貽贈榮祿公諱文炳繼配馮太夫人生蓋

屋公諱文炳知陝西藍屋縣是爲府君考始入籍

順天配徐太夫八康熙甲午順天舉人諱覺民公

女三世皆以府君貲

誥贈光祿大夫太子少保戶部尙書加一級妣皆贈

一品太夫人

雍正九年辛亥

府君生府君兄弟四人皆徐太夫人出以同祖兄弟爲次長伯父堂字冠山行三次伯父垣字仲君行四次伯父筠字竹君行五次卽府君行六以正月十二日未時生蓋屋官署

雍正十年壬子

府君二歲

雍正十一年癸丑

府君三歲

雍正十二年甲寅

府君四歲

雍正十三年乙卯

府君五歲先祖罷官謹按先祖行述云少從高安
相公受經又從宜興儲太史大文學最受知于學
使吳縣吳公士玉屢躡鄉闈以廩膳生貢國子監
試補八旗教習期滿發陝西以知縣試用署咸寧
縣補盩厔縣縣有無田浮糧民病甚爲請于上官
得豁又方議鑿南山通四川輓道亟上狀言道險
僻不可開工亦寢卒以事事持正不得意于上官
撫他事劾落職是冬去盩厔寓涿州丁氏丁翁惇

五與先祖爲友經錫經聞之五伯父云余與余季
暨表弟丁兆隆年相次嘗同戲其家大樹下後三
人皆成進士

乾隆元年丙辰

府君六歲從先祖回京師初寓梁家園

乾隆二年丁巳

府君七歲先祖定居日南坊李鐵拐斜街雙槐書
屋雙槐先祖手植也始從國子生史若蒙先生猶
興學先祖延師必碩儒府君所從師如蔣秋涇

顧河干光朱秬堂乾吳賡華光昇諸先生皆通彥

乾隆三年戊午

府君八歲

乾隆四年己未

府君九歲

乾隆五年庚申

府君十歲始爲四書文塾師授題曰孝弟也者其爲仁之本與府君有句云孩提之童皆有良知良能之愛敬而大人之學無非大本達道之中和師奇之

乾隆六年辛酉

府君十一歲自七歲時先祖授以先儒理學書至是有志于存心檢身之學乃取數年所誦習篤志力行一言一動依功過格朱墨之以自倣省旬計之功少過多必自責三伯父時相戲欲府君記過而府君益加肅事兄愈恭

乾隆七年壬戌

府君十二歲謹按府君作蔣秋涇先生詩序曰某年十二從先生游先生曰孺子何以自處對曰願爲豪傑先生曰噫其次也然某有所作先生亟賞之

乾隆八年癸亥

府君十三歲從朱秬堂先生學秋先祖母徐太夫人卒病中惟四伯父侍晝夜不離左右先祖性嚴厲小不如意呵撻立至府君將順無少違晨與五伯父入塾先祖不許入內侍病病亟始呼之奔赴先祖母已不能言矣府君抱憾終天哀毀盡禮先祖母臨卒謂先祖曰兩幼子俱恂謹肯讀書我死後幸勿督責太過府君至老爲不孝輩道之輒潛然出涕後再官學士時請貽贈外祖父母摺云臣年十三失恃臣母未嘗受臣一日之養臣願得以

臣本身妻室應得封典貳贈臣外祖父母以稍慰
臣母於地下

乾隆九年甲子

府君十四歲先祖葬先曾祖考妣于二老庄之阡

先祖妣祔于迤左寒家墳墓在京師者始于此謹

按府君作樂府正義序云某年十三從學於秬堂

先生先生詔某曰不讀線釘書無用也授以考工

記明年夏某讀周禮天官至秋官先生喜曰如此

可教矣府君以讀書攻苦病謹按府君作五伯父

墓誌曰癸亥七月先妣見背公與某同卧起夜讀

古書手鈔默誦鷄鳴不休明年某遂病而公愈強
力

乾隆十年乙丑

府君十五歲十月服除與五伯父同應郡試受知于府丞石首鄭公其儲擢第一五伯父次之同謁鄭公公笑曰是皆美才弟可先兄耶旋同受知于學使戶部侍郎臨桂呂公熾補順天府學附生從顧河干先生學讀先秦西漢書作文宗明黃石齋後己亥過浙中呈顧先生詩云我年十五從師游奇字疑義初討蒐倪黃易傳強涉獵韓孟詩句爭

唱酬布衣氈帽惡不耻夜雪僵立談魯鄒

乾隆十一年丙寅

府君十六歲正月順天府尹常州蔣公炳邀其同鄉劉文定公綸程文恭公景伊錢文敏公維城侍郎莊公存與培因兄弟設筵招五伯父與府君而試劉公授題崑田雙玉歌詩成諸公驚喜明日皆先來就訪

乾隆十二年丁卯

府君十七歲應學使者科試擢第一秋以第六名舉于鄉同考官本房修撰後官禮部侍郎仁和金

公姓撥房編修陽湖湯公大紳座師滿洲阿文勤
公克敦諸城劉文正公統勲將書榜時蔣京兆與
諸公言曰大興朱氏有兩神童不知雋否初唱名
卽府君蔣大喜後召見卽以姓名上達寒家
至府君始發科先曾祖母馮大夫人年八十喜甚
榜後謁阿文勤公公曰子年少而魄力大似先師
安溪李文貞公劉文正公招至第中命與公子文
清公同題壁間狻猊噬虎圖用東坡石鼓詩韻詩
成公讀至東龍西龍鬥赤日白鬚老蛟碎玉斗句
大叫曰真長吉語蓋府君數年來詩文務爲恢奇

奧衍之作不肯一字猶人帖括亦然是年從編修仁和湯公萼聯學公病其好奇裁抑之乃復取明天崇問及國初文較醇者揣摩之遂雋春秋試

乾隆十三年戊辰

府君十八歲先曾祖妣馮太夫人卒會試中式十二名同考官庶子後官內閣學士華陽顧公汝修座師大學士常熟蔣文恪公溥協辦大學士祁陽陳文肅公大受兵部侍郎後官兩江總督滿洲鄂剛烈公容安內閣學士後加禮部尚書銜長洲沈文憲公德潛殿試第二甲第四十七名

賜梁國治榜進士出身改庶吉士習國書

乾隆十四年己巳

府君十九歲先妣陳夫人來歸先外大父

諱邦勲

宛平人雍正己酉舉人官至貴州恩南府知府三
伯父以明紀綱目館謄錄議叙州同分發江西

乾隆十五年庚午

府君二十歲恭賦

萬壽詩用韓愈南山詩一百韻府君庚午以前詩爲人竊
去後編知足齋詩以是年爲始四伯父舉于鄉
乾隆十六年辛未

府君二十一歲散館題唐韓愈送李愿歸盤谷序
欽取清書第一名授編修四伯父成進士榜下分發山東
以知縣用

乾隆十七年壬申

府君二十二歲充功臣館纂修五月適馮女生六
月大考翰詹題納涼賦賦得風動萬年枝詩擬
董仲舒天人第三策閱卷官阿文勤公得府君卷
欲置第一時大考卷尚不糊名汪文端公由敦
以資淺抑之進呈

欽定二等二名陞侍講文勤于門下士獨愛府君府君一

通謁不再至門文勤在衆中謂府君曰子何久不得一見冬三伯父自江西以官事至京居家一月行府君作詩五章送別兼寄四伯父時知山東濟陽

乾隆十八年癸酉

府君二十三歲五伯父舉于鄉祖父課子最嚴督以怒責五伯父府君左右翼中杖傷股至是皆登科五伯父爲諸生時已負盛名劉文正公延至家

修 盛京通志

乾隆十九年甲戌

府君二十四歲恭逢

聖駕東巡謁

祖陵禮成恭紀四言詩二百韻五伯父成進士同官翰林
家貧出則一車紀曉嵐先生戲贈詩有兄弟同車
共一驛之句五月不孝錫經生

乾隆二十年乙亥

府君二十五歲得咯血症以瘁于學故病三年幾
殆至戊寅春始愈府君女兄弟六人長適河南太
康縣丞王公啟緒次適乾隆庚午舉人呂公元龍
三適乾隆辛卯舉人山西五臺縣知縣何公延禮

四適乾隆丁丑進士左庶子王公大鶴五許字監
生張公起麟未嫁卒六庶母謝太宜人出適監生
王公振翫是春姑夫呂孝廉卒遺孤未暱二姑母
欲死之吞金雉經皆以救免遂大病府君亟以歸
朝夕開導責以撫孤爲重親視湯藥久之竟瘳

乾隆二十一年丙子

府君二十六歲三姑母適何以疫暴卒府君病中
爲經營其喪

乾隆二十二年丁丑

府君二十七歲

聖駕南巡恭進頌八章冬充 日講起居注官三伯父罷

官歸

乾隆二十三年戊寅

府君二十八歲春扈

蹕謁

陵三月十六日

駕還宮十八日 大考翰詹題瑾瑜匿瑕賦河防得失疏

野舍時雨潤詩

欽定二等九名陞侍讀學士先是府君逢

國慶典所進冊

高宗純皇帝於幾暇時閱宮中陳設見之亟賞異問掌院
學士曰朱珪學問比張照汪由敦如何府君以文
字受特達知實始于此

乾隆二十四年己卯

府君二十九歲京察一等記名三月錫緯生
夏四伯父以違養久自長清移疾歸秋奉命副
翰林侍讀寧都盧公明楷典河南鄉試府君矢恃
早依庶祖母李太夫人以生後于嘉慶己未年請
貤贈一品太夫人者也府君既庶祖母如母出入
必面起居必偕旣貴恭敬將順喜愠無違疾病既

湯藥唯謹如是幾二十年自官翰林太夫人每憂
府君出使則將遠離至是太夫人卒後數日聞典
試之命葬李太夫人於永定門外劉家窑事畢
始赴豫既至竭十八晝夜之力閱場中卷四千
八百有奇得士吳廷堅等七十一人吳睢州人闡
中搜落卷得之策對歲差舉宗動天以岐周分五
山五嶽且証嶽山爲吳山分野尤了了榜發知爲
老知名士謁時骨相寒甚聞有隱德病臥旅寓一
錢不妄受真清介讀書士也其後如御史董君之
銘曹君坦吏部郎中銀君文昭濟東道李君燕仕

內外皆有聲初出闈有云汜水拔貢禹文煦者能文被擯府君亟取其卷閱之佳甚爲之泣下如雨作詩自訟後禹生以壬午癸未聯捷凡星使還

朝地方官皆有縞綺之獻府君悉却不受時上海胡憲靖公寶瑔巡撫中州爲監臨官諭屬官云朱學士端人汝輩不可有所饋遺復命後以

聖武遠揚平定回部西陲永靖恭紀大功進柏梁體詩一百韻旋奉命告祭南嶽衡山十一月十二日啟行於信陽州度歲

乾隆二十五年庚辰

府君三十歲正月二十一日詣嶽廟行祭告禮禮成登祝融峯觀雲海窮陟奇勝有記有詩七言一章尤橫絕歸途再經河南湯陰謁嵇侍中墓墓在頌村野田中有碑爲宋韓魏公所誌府君向村民借木橙登而讀之乃邑人任倫所重錄碑忽搖抗當風而動讀竟尚不止亦異事也復命後侍班觀耕臺

上問汝京城人北方有汝好學問耶旋充會試同考官得士八人多知名士其後睢州蔣君曰綸官至工部侍郎中江孟君邵官至副都御史南城陳君奉茲

官至江蘇布政使薦而不售者吳江陸君耀上元
陳君步瀛後皆官巡撫政績有聲又湯君愈耆宿
也邵編修齊然急詣府君拜謝曰君竟得吾師湯
先生湯君尋亦捷辛巳會榜秋七月授福建分
巡糧驛道同時沈庶子栻授河東道 陞辭

上曰汝等皆好翰林但文章虛政事實爾等當爲國家實
心辦事遇有地方賑濟事尤須實力查辦府君請祖父
就養祖父曰汝兄官山東我不能往而能偕汝數
千里至閩耶遂泣別啟行過杭州渡江出蕭山南

門躬拜西山祖墓

乾隆二十六年辛巳

府君三十一歲夏兼攝福州府事毀和合二聖麻
三相公牛頭大王鐵頭和尚諸淫祠民大驚服府
君本以文學侍從初試吏事欽承

聖訓駁名實辨利病蓋攝郡一年練于吏治矣

乾隆二十七年壬午

府君三十二歲仍攝福州府事郡試得士如梁府
丞上國上治兄弟林編修澍蕃喬蔭兄弟襲太守
景瀚林太守其晏皆識之髫年秋鄉試充監試闈
中物色佳卷榜後盡發落卷數千選鰲峯書院能

文之士十人閱之取其佳者送入書院肄業爲捐
膏火後得雋者甚夥是年三伯父復起用選陝西
大荔縣丞

乾隆二十八年癸未

府君三十三歲冬陞福建按察使未到任署布政
使有藩庫平餘銀三千兩以之充育嬰堂公用府
君後任晉藩及開府皖粵未嘗受平餘關稅陋規
也陳地方情形摺云閩俗雖愚悍而地方親民之
官果能隨事實心整飭開導必無不可治之民不
可化之俗泰

硃批此語甚是勉爲之欽此

乾隆二十九年甲申

府君三十四歲九月先祖光祿公卒府君少篤至性事先祖每食必侍旣通籍趨直史館日必歸同飲饌或弔問慶賀途遠時久有留一飯者未稟知必恐飢而歸恐祖父久待也在閩公事暇每北望魂夢不寧在糧道署種菊昨秋最盛旋聞命遷官旣移臬署仍種之猝者十之六府君益疑悸幸已請覲歸省有日奏未抵京而訃已至亟交代畢十月遂歸計秉臬於閩僅一年頻值大案海澄

公黃仕簡劾奏福建大小官吏受洋行陋規奉

旨命刑部尙書舒赫德侍郎裘曰修馳驛前往審辦兩公

察知府君平曰從不買洋貨亦不受洋商一錢特

加敬服兩公以 欽使署督撫直提州縣案牘人

犯官民皆以爲苦府君面爭以爲例必由臬司審

轉於是無拖累之人無延宕之案裘公乃益起敬

後 召對時奏曰

皇上知人之明非臣等所能仰窺萬一如朱珪者白面書

生臣知其學問淹通不知其操守好而練于事如

此同時又有僞官逆書二案並發僞官者閩八裘

自位冒康熙年間平臺軍功恩賞私造劄付鬻武
職既敗露授受同罪連斂十人府君嚴訊得實案
成誅正犯一人其受欺者不株連逆書者梁姓家
譜內有太祖皇考等不法字爲仇家所首府君憐
其爲鄉僻愚妄訊明出其祖之手讞上戮其屍子
孫得不坐後有舉孝廉者計偕過杭州詣督學署
泣拜而府君久忘之矣旣北還取道越中攜錫經
拜掃黃閣河祠墓及京口值明春南巡先期挑
淺鎮江築埠舟不能通府君奔喪心急乃由大江
行嚴冬皆北風待風數百艘積月不行時錫經侍

府君具牲醴作文祭江日正午焚文踰刻而南風大作明晨達揚州此事府君終身未嘗告人實錫經親侍目睹者不敢爲虛詞飾說也除夕前一日抵京與諸父執手一慟幾絕

乾隆三十年乙酉

府君三十五歲正月與諸父治先祖喪合葬于二老莊之阡塋畢與四伯父對榻眠食起居皆共各攜子伴宿互教之夜則卧與講誦每憶祖父祖母輒對哭失聲見不孝兄弟學有進則相賀有病遞撫摩之至丁亥起官凡二十有六月無間也初先

曾祖官楚中伯祖妣陳從任卒寄櫬武昌僧寺中
至是府君乞願翁頤往移歸與伯祖合葬於永定
門外劉家窑

乾隆三十一年丙戌

府君三十六歲錫緯出痘病劇幾死數月而瘥
乾隆三十二年丁亥

府君三十七歲正月服闋詣宮門召見

天語垂詢家世里居墳墓甚詳二月二十一日授湖北

按察使三月初出京抵楚奏地方情形略云楚俗
譸張爲幻得情不易然風俗雖有澆淳而聽訟官

果能虛心實意慎重周詳亦可情偽無遺轉移有漸奉

硃批甚是勉副此言而行欽此旋以用師緬甸奉

旨兵過地方各省特派大員專司駟務楚北派府君司之

卽日馳抵省南界公安縣之孫黃駟挨查至北界

襄陽縣之呂堰駟條上六件並云軍興駟務必期

電掣風清旣免遲延亦無擾累務於公務有裨不

貴文具得

旨嘉獎適聞楚同時各有聚衆逆案擒獲後府君悉心審

辦不敢稍縱然脅從者皆得原免伏法者數人聞

省不啻數倍之矣是冬姊夫馮秉驥來與女兒成婚署中馮通州學生家徹寒軒露頭角府君相

攸得之馮後中丁酉副榜官甘肅張掖知縣

乾隆三十三年戊子

府君三十八歲夏調山西按察使由太行山取道赴晉秋鄉試充提調於闈中見幼童郭在達文頗佳物色之後郭于辛卯科發解庚子入詞館今任吏部郎中時冀寧道徐公浩府君從舅也河東鹽運使沈公栻河東道葉公佩蓀俱相得公事暇倡和最盛

乾隆三十四年己丑

府君三十九歲二月陞山西布政使秋 奏酌議
保護城工永期鞏固大意謂晉省土性不一宜修
築者爲粘土黃土立土不宜修築者爲巒土沙土
黑土又取水有遠近或近水多巒遠水無巒承辦
不力不得辭其罪查原辦官保固三十年立法至
爲詳盡而各員多已易任城工緊要尤在謹小預
防一磚一片坯隨時檢葺所費至微接任之員以爲
責有攸歸漫不經意漸致墜朽請嗣後責令現任
各員勤加葺護按季報明上司如有因循玩愒將

原辦官及現任地方官一體叅處分賄立法仍可
相維責成不敢坐諉矣 奏上下部議行時奉巡
撫委勘右衛裁缺衙署兵房估價等案由忻州崞
縣代州馬邑朔州平魯前往朔平府由左雲懷仁
山陰一路回省是冬府君始學道通任督脉召先
天真炁轉河車得叅同契悟真篇讀之遂大悟徹
後數十年夜坐不卧至老益精進不衰十一月從
兄錫秬年十九才而夭四伯父長子也府君於諸
姪中最愛之居憂時授以詩古文詞之法丁亥之
任湖北挈之迎婚于江西寧都州裴氏暨將北歸

兄不忍行府君正色曰汝不喜歸見父而以別叔悲乎蓋府君視姪如子旣行思之不已作詩寄之至是聞內耗號慟欲發狂曰吾兄素慈吾憂不在姪也

乾隆三十五年庚寅

府君四十歲府君宦遊所至匠成人材甚衆在閩則鰲峯書院在晉則晉陽書院而晉之俊髦從游者如裴學士謙朝夕問業裴亦念德不忘後官京師一二日輒來數晨夕也是秋五伯父典試閩中府君念舊治所在賦詩望遠兼寄懷想榜發府君

素所賞識之士林喬蔭林其晏俱傳錫經應童子試補順天府學附生授室徐氏乾隆己未翰林福建鹽法道錢塘諱景熹女時錫經有從兄錫秬大功服新婦已自武林至晉數月矣府君必俟服滿後始令成婚曰吾不教汝以失禮也

乾隆三十六年辛卯

府君四十一歲夏入覲六月抵京屢蒙召見上問巡撫鄂寶人何如對曰操守好辦事認真又

問在閩臬時督撫爲誰以總督楊廷樟巡撫定長對上曰楊廷樟才情好對曰誠如聖諭楊廷樟才情好定

長操守好

上曰定長乃鄂寶一流人物對曰誠如聖諭定長鄂寶雖性情不一而其操守好辦事認真實是一流人物二十六日命回任府君與諸父別數年得聯床旬日于月杪啟行時秋雨暴漲途間皆成巨浸渡滹沱河坐叵羅人昇於頂而過瀕于險者屢矣秋鄉試充提調五伯父以侍讀學士視學安徽時撫軍奉廷寄工部題駁山西豐鎮寧遠二廳建蓋衙署營房報銷一萬一千三百餘兩之多其中有無浮冒滋弊傳諭該撫據實詳查撫軍鄂公委

府君子闡事竣後親往會同兩道逐加勘明查辦時某道卽揭承辦官同知威中額侵蝕銀三千兩府君以事未覈實不可輕信九月下旬馳抵寧遠查三廳工程首尾三百八十餘里逐一拆勘有與原估尺寸不相符者木植圍徑盈縮不一均勻率算尙屬有盈無縮惟不照原冊如法造作又未據實聲明請將該員嚴議賠繳某道堅執前說不肯會銜十月初旬府君旋省時已入夜卽謁鄂公談至四鼓議不決適次日有

旨鄂公去任府君護理山西巡撫兼提督印務乃自具摺

奏上

允行時舉行武鄉試府君充監臨主考官旋奉廷寄
上諭鄂寶本拘迂無用之人今夏朱珪陛見朕面詢之據
奏其操守好辦事精明所言殊爲失實封疆重寄豈僅
以經經自守爲尙朱珪乃以該撫操守爲言所見已小
至精明二字與鄂寶尤爲擬不於倫着傳旨申飭欽此
府君具摺恭謝

聖訓奉

朕批此亦汝爲屬員所常有之事不深怪也但汝不可不知耳欽此又奏酌改直隸州散州以裨地方大意謂

平陽府屬之霍州路當東西孔道現有六百里軍報往來請改爲直隸州以趙城靈石兩縣隸之吉州係簡缺僻處山陬民淳事少請改爲散州與所屬之鄉寧並隸平陽奏上下部議行又奏籌撥歸化綏遠二城倉貯穀十萬餘石按年搭放綏遠城兵糧既可出陳易新不致紅朽之虞而軍糈不敷亦免動項採買之煩奉

硃批如所議行欽此又議奏籌土默特當差官兵盤費大意謂土默特蒙古原以游牧爲生所有牧廠固不便聽其開墾致虧本計而地既廣濶無礙牧廠

亦可藉收餘利以濟公需勘得熟地二千三百餘
頃係有力蒙古陸續開墾轉租請免其私墾私佃
之罪另招附近窮苦官兵及民人認耕納租查明
城砂地五百餘頃仍給蒙古作爲牧廠其可墾荒
地二千餘頃勘得有礙牧廠者永禁私墾無礙牧
廠者八百餘頃已據各蒙古民人情願具認照熟
地一律定租共該租銀六千餘兩賞給當差官兵
作爲盤費奏上下都議行又奏新開牧地米
石請改徵折色以便民除弊大意謂太僕寺牧地
永盛庄迤東地勢平坦墾熟之後徵收本色運送

張家口以供兵糈建倉令民輸納其運脚于永盛
庄迤西折色銀內給發今地畝墾種齊全通行陞
科查此項地處極北苦寒不宜種粟每歲于四月
方可佈種雜糧甫交秋令隕霜甚早輸將竭蹙村
民籲請照迤西地畝改徵折色且可節省運腳解
赴直隸足敷採買若不早爲變通恐陽奉陰違不
免折徵折解之弊與其懲創于事後曷若更正于
目前于便民除弊兩有裨益 奏上下部議行府
君護篆凡三月除夕交卸回本任

乾隆三十七年壬辰

府君四十二歲秋七月 奏請除印花虛文以清
郵累大意謂驛有距州縣數十里者令長不能到
驛則派胥役長隨經管與差員跟僕同類分肥借
粘印花浮開使費卽驛在同城而差務一時並集
勢難一一與差員面貼往往馳驛者得夫馬卽遄
行各驛差人追至數站後補貼於是藉稱必須使
費若干州縣顧考成無從辨其真偽差已過而費
尙懸爲累特甚竊以地方悞差差員原可叅奏或
咨督撫查叅州縣遇形跡可疑者不難索賒勘合
不恃上站印花爲防僞具請嗣後有驛官於應付

後將過站日期應付實數有無多索遲悞填繕印文申報督撫驛道按季彙咨兵部查核此奏撫軍難之府君遂專摺徑奏上下部議行時額駙公福隆安爲兵部尙書甫從軍營歸往來皆取道晉中不以此奏爲嫌謂同官曰此不可不准也府君每祈雨齋心菲食數十日不雨不然往往一二日輒應是年有望雨喜雨諸詩五岳游人蒲圻張白蘊開東來白蘊行高而文深府君于丁亥聞其名欲延爲經等師不果來至是將游五臺恒山遂過訪投五言詩百廿韻留署中百餘日相得極歡

如其韻和之贈別並賦招隱篇

乾隆三十八年癸巳

府君四十三歲正月再護撫篆者七日閏三月四
伯父卒伯父篤于孝友體素弱善病府君友于諸
兄而四伯父尤爲同志寒燠悲愉如一體憶先是
甲申年祖父齒聞至閩時府君號摒昏憤中忽問
來人曰吾四兄如何對曰病甚乃大疑曰汝必不
肯實告我其人言出京日實無他乃愈疑行抵涿
州遇吳友急問曰四哥無恙乎對曰病及抵京先
遣人歸視曰汝一見吾兄卽才報距居巷不遠其

人奔來府君心動遙問曰見兄乎曰見矣悲喜交集奔歸撫棺慟後抱四伯父復慟曰不圖今日重相見也至此聞訃乃大慟稍已卽曰吾當撫其孤與吾子同教誨飲食之不足報吾兄愛或稍慰吾兄慈耳乃急迎寡嫂裴暨五弟錫田八弟錫召十弟錫珏五弟之子爲二兄後歿俱來晉署延師教之後諸弟先後夭折惟澍得入學食廩登拔萃科府君輒喜且悲五弟遺女二八弟遺女二皆爲擇名門嫁之八弟無子爲立六弟錫尚之子溥爲之後爲娶婦蓋自是年至子易簣時惟府君遠官粵

東暨澍乙丑之官暫相離餘未嘗不一日與居也
府君學道有心得不由師授而兼通禪悅則得之
四伯父嘗寄詩曰對床夜雨夢猶頻一卷波羅記
岸津自注去冬夢兄授余金冊有到彼岸字六月
奉委赴歸化城薩拉齊勘水災奏勘得成災地
一千一百九十九餘頃各戶先行撫卹給一月口糧
坍塌房三百三十餘間予修費增築堰壩疏消積
水務於秋令全行涸出則明歲地力更必淤肥再
于春令察看民情借給籽種又查蒙古口糧地畝
農民承種分租者十之八九因非承納官糧例不

查辦但同屬災黎田廬蓋藏俱被漂蕩明春籽種
稱貸尤艱實屬作苦民殊堪憫惻可否仰邀格
外天恩照民地撫卹例酌借一月口糧再于明
春查有願借籽種者准其一體酌借統俟秋收後
免息還倉于蒙古農民交有裨益奏上奉

硃批已批示撫臣摺矣覽奏俱悉欽此九月五伯父以安
徽生員欠考捐貢部議降三級調用奉

旨念其學問尙優加恩授爲編修在四庫全書館行走府
君聞命具摺謝恩云在臣兄感奮自新宜何
如報稱而臣之關情驚寵實莫可名言十一月錫

經生子灝先妣方病以得孫喜甚遂小愈

乾隆三十九年甲午

府君四十四歲四月灝以痘殤先妣哭之痛乃復病秋詳請豁免河灘地畝無着租稅撫軍入奏奉諭旨內有此事必係藩司朱珪沽名釣譽之所爲句尋有旨與臬司黃檢問藩司朱珪居官如何黃覆奏謂撫守好性情和平惟待屬員一味寬容辦事時形遲鈍臣每見其終日讀書於地方事毫無整頓云云蓋府君素不詭隨且與黃趨尚殊然卒不以此怨黃後黃得罪貧甚憲府君終始周卹之十餘年至黃卒

乃已

乾隆四十年乙未

府君四十五歲春迎三伯父至署盤桓數月極歡
夏請覲蒙允于五月初六日起身中途得

旨朱珪現准來京陛見俟到京後另降諭旨府君寄諭錫
經卽日奉母北歸不可稍有留滯先母病篤不能
起床聞府君內召甚喜小瘥卽力疾強起治裝
於十六日昇轎而行府君卽于是日抵圓明園

宮門召見

諭曰汝學問好今用汝爲翰林派汝修書好爲之卽授翰

林院侍講學士充明紀綱目館纂修府君叩謝出
喜不自勝蓋在外任十有六年晨夕惴惴懼不勝
任得返舊居如釋重負矣五月杪先母抵都府君
無屋可居乃寄居於三伯父双槐老屋仍攜四伯
父諸子同居人衆不能容府君怡然也八月初六
日爲錫緯授室張氏乾隆壬申庶常吏部郎中宛
平諱模女禮成五日而先母見背經婦徐以侍姑
疾得病越四十日亦歿閏十月始卜居于街南署
其齋曰鄆不草廬手跋云余宦游十餘年不意兄
弟復此聚處門對伯兄老屋左鄰竹君兄椒花吟

舫爰挈仲兄諸子居之屋雖櫺狹于我則宜時與
同年故友門生親串爲詩酒消寒會復充日講
起居注官府君由學士出授外任今復入爲學士
例得接算前俸而院中辦事者齟齬之府君不校
也

乾隆四十一年丙申

府君四十六歲三月初六日葬先妣于呂村新阡
旋奉

旨在上書房行走侍

今上皇帝學時初置文淵閣領閣提舉等官府君充

文淵閣直閣事 皇十一子刻章以贈作詩謝後以
贈及門阮中丞元

聖武遠揚平定兩金川府君進闡謨一篇秋爲從弟錫召
授室牛氏江蘇江陰縣知縣天津名兆奎女

乾隆四十二年丁酉

府君四十七歲正月初與 重華宮茶宴聯句和
詩寡嫂裴卒寧都州吏目曲沃諱昇文女年十五
歸二兄錫秬生一女兒病篤嫂爲剜股十七而寡
回先伯憐之五弟錫田娶婦李有娠預命生男爲
秬後卽澍也四月考試差府君以曾爲藩臬大員

不敢復與秋闈榜後八弟錫召挑取四庫全書館

贍錄

乾隆四十三年戊戌

府君四十八歲正月錫經繼娶天津徐氏江西布政司庫大使諱大楷女先祖妣之姪孫女也旋於七月歿會試充同考官得士會元繆祖培等二十四人如管侍御世銘戴博士祖啟崔觀察映辰洪太守其紳皆通材八月歲考錫經食餼錫緯補順天府學附生十二月孫涂生

乾隆四十四年己亥

府君四十九歲春充四庫全書館總閱五月奉命爲福建鄉試正考官副者戶部員外郎歙縣程君世淳途中有日記一卷抵閩遍閱卷八千有奇得士張經邦等八十五人其後仕學有聲者如伊太守秉綬鄭進士光策等甚夥歸途取道浙中拜蕭山祠墓時五伯父視學福建遇于石門舟次在杭謁業師顧河干先生房師金海住先生過嘉興與同年馮孟亭先生門生陸朗夫中丞飲烟雨樓錫經舉于鄉續授室王氏東閣大學士韓城文端公諱杰女十二月爲十弟錫珏授室查氏乾隆甲戌

進士給事中天津諱善長女除夕兩子錫經錫緯
三姪錫田錫召錫珏一婿秉驥俱夫婦拜賀于牕
前府君顧而樂之以爲庭闈聚首是年最盛

乾隆四十五年庚子

府君五十歲正月與重華宮茶宴聯句和詩
京察一等記名以應陞之缺進單

聖駕五巡江浙恭進樂府十九章秋恭慶

七旬萬壽進膚繹一篇內廷翰林公祝

聖壽屏文梁文定屬府君爲之府君以錫緯病篤辭梁公
乃命其甥李編修起草仍屬府君潤色七月十五

日錫緯卒八月奉 命視福建學卽接五伯父任

上閱進呈文

問之梁公對曰編修李堯棟作學士朱珪

改賜蟒袍筆墨

九月初三日在遙亭子 行宮

謝

恩

召見

諭曰學政與士子相見有教導之責近來文風愈趨愈下
屢經申飭而所錄仍不過如是當知返樸還淳以清真
雅正爲貴又

問汝往換汝兄歸免冠謝

上曰汝學問較勝對曰臣不如臣兄

上徵哂曰汝學問儘去得前文是汝作耶對曰編修李堯

棟起稿臣改潤蒙

皇上獎賞

上曰作文以意理勝不專在記誦故實引用難字因反覆申明取文貴正之意聽

諭不必再請訓矣叩謝出是年 謩恩請貤封三伯父中
憲大夫翰林院侍講學士加一級伯母盧封恭人
瀕行上五箴於

今上潛邸十九日至二老庄拜墓至呂村見錫緯新墳
黯然神傷途中攬鏡見白髭賦五言古一首感錫

緯之天也過清江晤陳玉亭河帥祁陽相國文肅
公長君也府君年十八受知于文肅相期最厚是
時登堂拜母年七十三矣十月二十五日至蕭山
拜祠墓十一月十八日到任與五伯父會居于韓
雅堂半月遂別

乾隆四十六年辛丑

府君五十一年歲二月頒賜古稀說墨刻一卷
七月歲考及半恭陳情形畧云臣抵任後通行各
學諭以文必根柢經傳所已試各學承春州人頗
能記誦闕于講貫間拔一二以勸讀書泉州屬廬

奉派稽察右翼覺羅學